

續資治通鑑

冊
七

續資治通鑑卷第一百九十二

賜進士及第兵部尚書兼都察院右都御史總督湖北湖南等處地方軍務兼理糧餉世襲二等輕車都尉畢沅編集

元紀十

起旃蒙協洽正月盡疆圍作噩六月凡二年有奇

成宗欽明廣孝皇帝

諱特穆爾世祖之孫裕宗戩珍第三子也母曰徽仁裕聖皇后鴻吉

哩氏至元二年九月庚子生二十四年諸王納顏反世宗自將討平之其後哈坦復叛命帝往征之哈坦敗亡三十年六月乙巳受皇太子

寶撫軍北邊

元貞元年春正月癸丑以太僕卿濟爾哈朗為御史

大夫 壬戌以國忌即大聖壽萬安寺飯僧七萬

癸亥詔道家復行金籙科範 以隕霜殺禾賑安西

王山後民米 雲南行省左丞楊炎龍召為中書左

丞 以罷行樞密院賜行中省長官虎符領其軍

庚午以江浙行省平章阿喇卜丹舊作阿老為參知政

事 壬申立北庭都元帥府 罷瓜汝等州屯田

甲戌有飛書妄言朱清張瑄有異圖詔慰勉之 丞

相鄂勒哲舊作完澤今改等言往年先帝嘗命開真定冶河

已發丁夫人役值先帝升遐以聚眾罷之今宜遵舊

制俾卒其役從之 召大司農丞姚燧為翰林學士

修世祖實錄初置檢閱官究覈故事燧與侍讀高道

凝總裁之 禮部郎中王約請行贈諡之典以旌忠

勳付時政記於史館以備纂錄立供需府以專供億

從之授翰林直學士同修國史 帝之即位也翰林

學士王惲獻守成事鑑列敬天法祖愛民恤兵等事

為目凡十五篇所論悉本經旨至是命同修國史纂

修實錄惲集世祖聖訓六卷上之 二月丁丑翰林

學士承旨留夢炎告老帝以其在先朝言無所隱厚

賜遣之。壬午罷江南茶稅以其數添入江西權茶

都轉運使歲額。丁亥江南行省平章額森布哈

舊作

也先不言敢麻魯有兩夷未附金齒亦叛服不常請

調兵六千鎮撫金齒置駟入緬從之。庚子緬國來

貢。丁酉帝如上都。癸卯以呂天麟爲參知政事

立雲州銀場都提舉司。中書省言近者阿哈瑪

特僧格怙勢賣官不別能否只憑解由選法由是大

壞宜令廉訪司體覆以聞省臺覈實定其殿最以明

黜陟其廉訪司官亦令省臺同選爲宜從之。河東

山西廉訪使程思廉言太原歲飼諸王駝馬一萬四

千餘匹請止飼千匹平陽諸郡歲輸租稅於北方民

甚苦之請改輸河東近倉從之思廉剛正疾惡言事

剴切喜薦達人物或譏其好名思廉曰若避好名之

譏人不敢復爲善矣 三月乙巳朔安南世子陳日
燔遣使上表慰國哀又上書謝寬貰恩并獻方物

壬子禁來朝官斂所屬俸 戊午罷福建銀場提舉

司 中書言省臣樞密院御史臺例應奏舉官屬其

餘諸司不宜奏請今皆請之非便詔自今已後專令

中書擬奏 以東作方殷罷諸不急營造惟帝師塔

及張法師宮不罷 壬戌地震監察御史滕安上上

疏曰君失其道責見於天其咎在內庭竊干外政小

人顯廁君子名實混淆刑賞僭差陽爲陰乘致靜者

動宜兢兢祇畏側身修行反昔所爲以盡弭之道

執政不以聞安上遂歸 夏四月辛巳妖人蒙蟲僭

擬及其黨十三人皆伏誅 庚寅封乳母楊氏爲趙

國安翼夫人以後列朝封乳母遂沿爲故事 庚子

立掌謁司掌皇太后寶以宦者爲之 癸卯設各路

陰陽教授仍禁陰陽人不得遊於諸王駙馬之門

閏月丙午爲皇太后建佛寺於五臺山以前工部尙

書尼濟爲匠作院使董其役 己未罷打捕鷹房總

管府及司籍周用薄斂等庫徽州路銀場各處鹽場

仍免大都今歲田租 庚申河南行省虧兩淮鹽鈔

千錠遣官往鞫命隨其罪之輕重治之陝西行省山

東都轉運司竝有增羨鹽鈔各賜衣以旌其能 南

人洪邵學上封事妄言五運筭而遣之南人又有陳

利便請搜括田賦者執政欲從之參議中書省事王

構與平章何榮祖共言其不可辨之甚力得不行

壬戌塔奇呼阿薩爾以不法伏誅 詔禁抽分市舶

貨而匿其精細者 是月蘭州上下三百餘里河清

三日 帝以京師米貴益廣世祖之制設三十肆發米七萬餘石糶之其後每年增糶多至四十萬石行之既久多為豪強巧取乃令有司籍貧民戶數驗口給之減賑糶之直三分之一每歲亦不下二十餘萬石 五月庚辰詔各省止存儒學提學司一餘悉罷之 陞江南諸縣為州以戶為差戶四萬五萬者為下州五萬至十萬為中州下州官五員中州六員凡為中州二十八下州十五又以連州戶不及額降路為州 辛巳罷行大司農司 甲申詔自元貞元年五月以前逋欠錢糧者皆罷徵 丙申以邁迪舊作邁為簽書樞密院事邁迪太傅巴延舊作伯顏今改子也皇太后言巴延盡心王室欲令代其父知樞密院帝以其年尚少故有是命 六月戊申歷城縣大清河

盜壞民居 壬子詔遼陽省進海東清鶻二十四駟
每駟給牛六頭使者食米五石鷹食羊五口又狗遞
十二駟每戶給鈔十錠 甲寅翰林學士承旨董文
用等進世祖實錄 乙卯敕凡上封事者中書省發
緘視之然後以聞 癸亥立蒙古軍都元帥府於西
川徑隸樞密院 庚午立西域親軍都指揮使 是
月陝西旱饑行省右丞許辰議發廩賑之同列以未
經奏請不可辰曰民爲邦本今饑餒若此必俟命下
無及矣擅發之罪吾當任之遂發粟賑貸 辰澧地
接溪洞宋嘗選民立屯免其繇役使禦之在澧者曰
盜丁在辰者曰寨兵宋亡皆廢湖廣行省平章劉國
傑旣平田萬頃乃悉復其制又經畫茶陵衡郴道桂
陽凡廣東江西盜所出入之地南北三千里置戍三

十有八分屯將士以守之由是東盡交廣西亘黔中地周湖廣四境皆有屯戍制度周密諸蠻不能復寇盜賊遂息是月入朝賜玉帶錦衣弓矢臺臣言國傑在軍中每以家貲賞將士帝命倍償之部曲有功者各遷官 秋七月乙亥詔江南地稅輸鈔 丁丑御史臺言內地盜賊竊發者衆皆由國家赦宥所致請命中書立爲條格督責所屬期至盡滅從之 工部言通惠河剏造插垣所費不貲全藉主守之人上下修治請設提領三員專一巡護從之 乙卯詔申飭中外有儒吏兼通者各路舉之廉訪司每道歲貢二人臺省委官立法攷試所貢不公罪其舉者 命職官坐贓論斷再犯者加二等倉庫官吏盜所守錢糧一貫以下笞至十貫杖之二十貫加一等一百二十

貫徒一年每三十貫加半年二百四十貫徒三年滿

三百貫者死計贓以至元鈔為則 戊戌朱永福邊

珍裕以妖言伏誅 壬寅詔易江南諸路天慶觀為

元妙觀毀所奉宋太祖神主 八月辛酉緬國進馴

象三 癸亥以遼陽水賑之 己巳以駙馬納懷知

樞密院事 九月甲戌帝至上都 以托克托舊

朕脫為上都留守托克托穆呼哩舊作木華曾孫薩曼

今改之子也幼失怙其母篤意教之稍長直宿衛

世祖復親誨導尤以嗜酒為戒既冠喜從儒者遊聞

善輒服膺從世祖征納顏環甲率家奴數十人疾馳

擊之敵眾披靡世祖望見之大加嗟賞謂近臣曰薩

曼不幸早死托克托幼朕撫而教之常恐其不立今

能如此薩曼可謂有子矣親解佩刀及所乘馬賜之

由是深加器重得預聞機密之事帝卽位以來寵顧尤篤常侍禁闈出入唯謹退語家人曰我昔親承先帝訓飭令毋嗜飲今未能絕也豈有爲人知過而不能改者乎自今以往家人有以酒至吾前者必痛懲之帝聞之喜曰集賽中如托克托者無幾今能剛制於酒真可大用矣遂有是命托克托至上都政令嚴肅克修其職 乙亥用帝師奏釋大辟三人杖以下四十九人 己卯罷四川淘金戶四千還其原籍罪初獻言者 丁亥瓜哇遣使獻方物 史弼旣以罪廢至是起同知樞密院事伊爾嚕言弼等以五千人渡海二十五萬里入近代未嘗至之國俘其王及諭降傍近小國宜加矜憐遂詔還其所籍家貲拜江西行中書省右丞 壬辰湖南司獄郭玘訴浙西廉訪

司僉事張孝思多取廩餼孝思繫玘於獄行臺令監察御史楊仁往鞫而行省平章特穆爾達孝思至省訊問又令其屬官與仁同鞫玘事仁不從行臺以聞詔省臺遣官鞫既引服皆杖之 冬十月癸卯有事於太廟中書省言去歲世祖皇帝裕宗祔廟以綾代玉冊今玉冊玉寶成請納諸各室帝曰親享之禮祖宗未嘗行之其奉冊以來朕躬祀之命獻官迎導入廟先是監察御史楊桓疏陳時務請親享太廟復四時之祭又請正禮儀以肅宮庭定官制以省冗員禁父子骨肉奴婢相告訐者罷行用官錢營什一之利帝稱善然一時不能行也 甲寅中書省御史臺言江浙平章莽賚布哈陳臺憲非便事請自今監察御史廉訪司有所按覈州縣官與本路同鞫路官與宣

慰司同鞠宣慰司官與行省同鞠許之 十一月甲

戌太白經天 戊戌詔江浙行省括隱漏官田及檢

覈富强被役之戶 太師伊實特穆爾因議邊事入

朝兩宮賜宴如家人禮賜其妻圖宴服及他珍寶是

月以疾卒後追封廣平王諡貞憲 十二月丙辰荆

南僧普招寺偽撰佛書有不道語伏誅 伊蘇岱爾

之軍因李氈亂去山東其元駐之地為人所墾歲久

成業爭訟不已甲子命別以境內荒田給之正軍五

頃餘丁二頃已滿數者不給 減海運腳價鈔一貫

計每石六貫五百文著為令 丁卯禁諸王輒召有

司官吏時諸王錫錫舊作小薛今改等部曲率恣橫擾民駙

馬曼濟台舊作蠻子台今改私殺有罪有司官吏輒被號召至

是詔非奉旨毋輒加罪 是歲立巴約特舊作伯岳吾今改氏

爲皇后駙馬托里斯之女也 集賢學士闍復上疏
言京師宜首建宣聖廟學定用釋奠雅樂從之又言
曲阜守冢戶昨有司併入民籍宜復之其後詔賜孔
林洒掃二十八戶祀田五千畝皆復之請也 行臺
御史及浙西憲司劾江浙行省平章不法者十七事
詔遣侍御史尙文往詰之左驗明著猶力爭不服文
以上聞平章乃言御史違制取會防鎮軍數帝命省
臺大臣集議咸曰平章勳臣之後所犯者輕事宜宥
御史取會軍數當死文抗言平章罪狀明白不受薄
責無人臣禮其罪非輕御史糾事之官因兵卒爭愬
責其帥如舊均役情無害法卽有罪亦輕廷辨數四
帝意始悟平章御史各杖遣之

元貞二年春正月丙子蠲兩都站戶和雇和市 己

卯詔江南毋捕天鷲 上思州叛賊黃勝許攻剽水
口思光寨湖廣行省調兵擊之獲其黨黃法安等賊
遁入上牙六羅 丙戌安西王傅特齊托特穆爾等
復請立王相府帝曰去歲阿南達已嘗面陳朕以世
祖定制諭之今復奏請豈欲以四川京兆悉爲彼有
也賦稅軍站皆朝廷所司今姑從汝請置王相府惟
行王傅事 己丑以御史中丞圖齊爲御史大夫
御史臺言漢人爲同寮者嘗爲姦人捃撫其罪由是
不敢盡言請於近侍中擇人用之帝曰安用此曹其
選漢人識達事體者爲之 乙未詔諸王駙馬非奉
旨毋罪官吏 二月己亥朔中書省言陛下自御極
以來所賜諸王公主駙馬勳臣爲數不輕向之所儲
散之殆盡今繼請者尙多請甄別貧匱及赴邊者賜

之其餘宜悉止從之 詔奉使及軍官歿而子弟未

襲職者其所佩金銀符歸於官違者罪之 丙午禁

軍將擅易侍衛軍蒙古軍以家奴代役者罪之仍令

其奴別入兵籍以其主資產之半畀之軍將敢有縱

之者罷其職 庚戌詔軍卒擅更代及逃歸者死

丙辰詔江南道士貿易田者輸田商稅 庚申自六

盤山至黃河立屯田置軍萬人 丙寅以大都留守

司達嚕噶齊丹津舊作殺為中書平章政事時博果

密稱疾不出帝召至便殿謂曰朕知卿疾之故以卿

不能從人人亦不能從卿也欲以丹津代卿如何博

果密曰丹津實勝臣乃拜博果密平章軍國重事辭

曰是職也國朝惟史天澤嘗為之臣不敢當詔去重

字而以丹津代為平章政事 三月壬申罷太原平

陽路釀進葡萄酒其葡萄園民恃為業者皆還之

癸酉實都言晉王噶瑪拉舊作甘麻多爾岱舊作朵兒

言伊囉勒舊作月兒皆有異圖詔樞密院鞫之無驗帝

命言晉王者死言伊囉勒者謫從軍自效 丙子帝

如上都 丁丑以完顏邦義尼雅斯拉鼎劉季安妄

言朝政杖之徒二年籍其家財之半 夏四月絳州

黃巖饑杭州火竝賑之 五月戊辰朔免兩都徭役

辛未安西王遣使來告貧乏帝語之曰世祖以分

賚之難嘗有聖訓阿南達舊作阿南亦知之矣若言貧

乏豈獨汝耶去歲賜鈔二十萬錠又給以糧今與則

諸王以為不均不與則汝言人多饑死其給糧萬石

擇貧者賑之 甲戌詔民間馬牛羊百取其一羊不

滿百者亦取之惟色目人及數乃取 庚辰土番叛